

四庫全書

集部

欽定四庫全書

石倉歷代詩選卷四百五十五

明 曹學佺 編

明詩次集八十九

王守仁

山中立秋日偶書

風吹蟬聲亂林卧驚新秋山池靜澄碧暑氣亦已收青  
峰出白雲突兀成瓊樓袒裼坐溪石對之心悠悠倏忽

無定態變化不可求浩然發長嘯忽起雙白鷗

夜雨山翁家偶書

山空秋夜靜月明松檜涼沿溪步月色溪影搖空蒼山  
翁隔水語酒熟呼我嘗褰衣涉溪去笑引開竹房致詞  
值暮夜盤餐百無將露華明橘柚摘獻冰盤香洗盞對  
酬酢浩歌入蒼茫醉拂巖石卧言歸遂相忘

登泰山

曉登泰山道行行入烟霏陽光通巖壑秋容淡相輝雲

梯掛青壁仰見蛛絲微長風吹海色飄飄送天衣峰頂  
動笙樂青童兩相依振衣將往從凌雲忽高飛揮手若  
相待丹霞閃餘暉凡軀無健羽悵望未能歸

其二

天門何崔嵬下見青雲浮泱泱絕人世迥

闕

天秋暝

色從地起夜宿空明樓天鷄鳴半夜日出東海頭隱約  
蓬壺樹縹緲扶桑洲浩歌落青冥遺響入滄流唐虞變  
楚漢滅沒如風漚藐矣鶴山仙秦皇豈堪求金砂費日

月顏顏竟難留  
吾意在龐古  
冷然馭涼颼  
相期廣成子  
太虛顯遨遊  
枯槁向巖谷  
黃綺不足儔

不寐

天寒歲云暮  
冰雪關河迫  
幽室魍魎生  
不寐知夜永  
驚風起林木  
驟若波浪洶  
我心良匪石  
詎為休戚動  
滔滔眼前事  
逝者去相踵  
厓窮猶可陟  
水深猶可泳  
馬知非日月胡  
為亂予衷  
深谷自逶迤  
烟霞日堪弄  
在時在賢達  
歸哉盍耕隴

見月

屋罅見明月還見地上霜  
客子夜中起旁皇涕沾裳  
匪為嚴霜苦悲此明月光  
月光如流水徘徊照高堂  
胡為此幽室奄忽踰飛揚  
逝者不可及來者猶可望  
盈虛有天運嘆息何能忘

屋罅月

幽室不知年夜長  
晝苦短但見屋中月  
清光自虧滿佳人  
宴清夜繁絲激哀管  
朱閣出浮雲高歌正  
淒惋寧知

幽室婦中夜獨愁嘆良人事游俠經歲去不返來歸在  
何時年華忽將晚蕭條念宗祀淚下長如霰

答汪抑之

去國心已恫別子意彌惻伊邇怨昕夕况茲萬里隔戀  
戀岐路間執手何能默子有昆弟居而我遠親側回思  
菽水歡羨子何由得知子念我深夙夜敢忘惕良心忠  
信資蠻貊非我戚

其二

北風春尚號浮雲正南馳風雲一相失各在天一涯客  
子懷往路起視明星稀驅車赴長阪迢迢入嵐霏旅宿  
蒼山底霧雨昏朝彌間闕不足道嗟此白日微切磋懷  
良友願言毋心違

其三

聞子賦茅屋來歸在何年索居間楚越連峰鬱參天緬  
懷巖中隱磴道窮攀緣江雲動蒼壁山月流澄川朝采  
石上芝暮漱松間泉鷺湖有前約鹿洞多遺編寄子春



鴻書待我秋江船

一日懷抑之也抑之之贈既嘗答以三詩意若有歉焉是以賦也

一日復一日去子日以遠惠我金石言沈鬱未能展人生各有際道誼尤所眷常嗤兒女悲憂來仍不免緬懷滄洲期聊以慰遲晚

其二

遲晚不足嘆人命各有常相思忽萬里河山鬱蒼蒼中

夜不能寐起視江月光中情良自抑美人難自忘

其三

美人隔江水彷彿若可覩風吹蒹葭雪飄蕩知何處美人有瑤瑟清奏含太古高樓明月夜惆悵為誰鼓

涉湘千邁嶽麓是遵仰止先哲因懷友生麗澤

興感伐木寄言一首

客行長沙道山川鬱稠繆西探指嶽麓凌晨渡湘流踰岡復陟嶽弔古還尋幽林壑有餘采昔賢此藏脩我來

寔仰止匪伊事盤遊衡雲閒曉望洞野浮春洲懷我二三友伐木增離憂何當此來聚道誼日相求

次韻答趙太守王推官

詰朝事虔謁玄居宿齋沐積霖喜新霽風日散清燠蘭橈渡芳渚半涉見水陸溪山儼新宇雷雨荒大麓皇皇茲誦區斯文昔炳郁興廢尚屯疑使我懷悱惓近聞牧守賢經營亟乘屋方舟為余來飛蓋遙肅肅花絮媚晚筵韶景正柔淑浴沂諒同情及茲授春服令德倡高祠

混珠愧魚目努力崇脩名迂踈自巖谷

去婦歎

委身奉箕箒中道成棄捐蒼蠅間白璧君心亦何憊獨  
嗟貧家女素質難為妍命薄良自喟敢忘君子賢春華  
不再艷顏魄無重圓新歡莫終恃令儀慎周旋

其二

依違出門去欲行復遲遲隣姬盡出別強語含辛悲陋  
質容有繆放逐理則宜姑老藉相慰缺乏多所資妾行

長已矣會面當無時

其三

妾命如草芥君心比琅玕奈何以妾故廢食懷憤冤無  
為傷姑意燕爾且為歡中厨存宿旨為姑備朝餐蓄育  
意千緒倉卒徒悲酸伊邇望門屏盍從新人言夫意已  
如此妾還當誰顏

其四

去矣勿復道已去還躊躇鷄鳴尚聞響犬戀猶相隨感

此摧肺肝淚下不可揮岡回行漸遠日落羣鳥飛羣鳥  
各有托孤妾去何之

其五

空谷多淒風樹木何蕭森浣衣澗冰合採苓山雪深離  
居寄巖穴憂思托鳴琴朝彈別鶴操暮彈孤鴻吟彈苦  
思彌切嶺岿隔雲岑君聰甚明哲何幸聞此音

初至龍場無所止結茅菴居之

草菴不及肩旅倦體方適開棘自成籬土階漫無級迎

風亦蕭疎漏雨煩補葺靈瀨響朝湍深林凝暮色羣獠  
環聚訊語龐意頗質鹿豕且同遊茲類猶人屬汗樽映  
瓦豆盡醉不知夕緬懷黃唐化畧稱茅茨迹

始得東洞遂改為陽明小洞天三首

古洞閼荒僻虛設疑相待披萊歷風磴移居喜幽壇營  
炊就嵒竇放榻依石壘穹室旋薰塞何坎仍掃洒卷帙漫  
堆列樽壺動光彩夷居信何陋恬淡意方在豈不桑梓  
懷素位聊無悔

童僕自相語洞居頗不惡人力免結構天巧謝雕鑿清  
泉倚厨下翠霧還成幕我輩日嬉偃主人自愉樂雖無  
榮戟榮且遠塵囂聒但恐霜雪凝雲深衣絮薄

我聞莞爾笑周慮愧爾言上古處巢窟杯飲皆汙樽  
極陽內伏石穴多冬暄豹隱文始澤龍蟄身乃存豈無  
數尺椽輕裘吾不溫邈矣簞瓢子此心期與論

謫居糧絕請學于農將田南山永言寄懷

謫居屢在陳從者有愠見山荒聊可田錢鏐還易辦夷



俗多火耕放習亦頗便及茲春未深數畝猶足佃豈徒  
實口腹且以理荒宴遺穗及鳥雀貧寡發餘羨持耒在  
明晨山寒易霜霰

猗猗

猗猗澗邊竹青青岩畔松直幹歷冰雪密葉留清風自  
期永相託雲壑無違蹤如何兩分植憔悴嘆西東人事  
多翻覆有如道上蓬惟應歲寒意隨處還當同

南溟

南溟有瑞鳥東海有靈禽飛遊集上苑結侶珍樹林願  
言飾羽儀共舞簫韶音風雲忽中變一失難相尋瑞鳥  
旣遭縻靈禽投荒岑天衢雨雪積江漢虞羅侵哀哀鳴  
索侶病翼飛末任羣鳥亦千百誰當會其心南嶽有竹  
實丹溜青松陰何時共棲息永托雲泉深

溪水

溪石何落落溪水何泠泠坐石弄溪水欣然濯我纓溪  
水清見底照我白髮生年華若流水一去無回停悠悠

百年內吾道終何成

龍岡新構

謫居聊假息荒穢亦須治鑿巖薈林條小構自成趣開  
窗入遠峰架扉出深樹墟寨俯逶迤竹木互蒙翳畦蔬  
稍溉鋤花藥頗雜蒔宴適豈專予來者得全憩輪奐匪  
致美毋令易傾敝

其二

營茅乘田隙洽旬稱苟完初心待風雨落成還美觀鋤

荒既開徑拓樊亦理園低簷避松偃踈土行竹根勿剪  
牆下棘束列因可藩莫擷林間蘿蒙籠覆雲軒素昧農  
圃學因茲得深論毋為輕鄙事吾道固斯存

西園

方園不盈畝蔬卉頗成列分溪免甕灌補籬防豕蹄蕪  
草稍焚薙清雨夜來歇濯濯新葉敷熒熒夜花發放鋤  
息重陰舊書漫披閱倦枕竹下石醒望松間月起來步  
閒謠晚酌簷間設酣時藉草眠忘與隣翁別

水濱洞

送遠憩岵谷濯纓俯清流沿溪涉危石曲洞藏深幽花  
靜馥常閤溜暗光亦浮平生泉石好所遇成淹留好鳥  
忽雙下儵魚亦羣遊坐久塵慮息澹然與道謀

山石

山石猶有理山木猶有枝人生非木石別久寧無思愁  
來涉前庭仰視行雲馳行雲隨長風飄飄去何之行雲  
有時定遊子無還期高梁始歸燕鸚鵡已先悲有生豈

不苦逝者長如斯已矣復何事  
商山行采芝

無寐二首

烟燈暖無寐  
憂思坐長往  
寒風振喬林  
葉落聞窗響  
起窺庭月光  
山空遊罔象  
懷人阻積雪  
崖冰幾千丈

窮厓多雜樹  
上與青冥連  
穿雲下飛瀑  
誰能識其源  
但聞清猿嘯  
時見皓鶴翻  
中有避世士  
冥寂栖其巔  
繫子亦同調  
路絕難攀緣

諸生夜坐

謫居澹虛寂眇然懷同遊日入山氣夕孤亭俯平疇草  
際見數騎取徑如相求漸近識顏面隔樹停鳴騶投轡  
雁鷺進携榼各有羞分席夜堂坐絳蠟酒樽浮鳴琴復  
散帙壺矢交觥籌夜弄溪上月曉陟林間丘村翁或招  
飲洞客偕探幽講習有真樂談笑無俗流緬懷風沂興  
千載相為謀

艾草次胡少叅韻

艾草莫艾蘭蘭有芬芳姿況生幽谷底不礙君稻畦艾

之亦何益徒令香氣衰荆棘生滿道出刺傷人肌持刀  
忌觸手睨視不敢揮艾草須艾棘勿為棘所欺

鸚鵡和胡韻

鸚鵡生隴西羣飛恣鳴遊何意虞羅及充貢來中州金  
絲縻華屋雲泉謝林丘能言寔階禍吞聲亦何求主人  
有隱寇竊發聞其謀感君惠養德一語思所酬懼君不  
見察殺身反為仇

遊來仙洞早發道中



霜風清木葉秋意生蕭疎銜星策曉騎幽事將有徂股  
蟲亂飛擲道狹草露濡傾暑特晨發征夫已先途浙米  
石間溜炊火崑中廬烟峰上初日林鳥相嚶呼意欣物  
情適戰勝癯色腴行樂信宇宙富貴非良圖

別友

幽尋意方結奈此世累牽凌晨驅馬別持杯且為傳相  
求苦非遠山路多風烟所貴明哲士秉道非苟全去矣  
崇令德吾亦行歸田

贈黃太守澍

歲宴鄉思切，客人親舊踈。卧疴閉空院，忽來故人車。  
入門辯睂宇，喜定還驚吁。遠行亦安適，符竹膺新除。  
荒郡號難理，况茲征索餘。君才素通敏，窘劇宜有紓。  
蠻鄉雖瘴毒，逐客猶安居。經濟非復事，時還理殘書。  
山泉足遊憩，鹿麋能友余。澹然穹壤內，容膝皆吾廬。  
惟縈垂白念，旦夕懷歸圖。君行勉三事，吾計終五湖。

秋夜

樹暝栖翼喧螢飛夜堂靜遙穹出晴月低簷入峰影  
窈然坐幽獨怵爾抱深警年徂道無聞心違迹未屏  
蕭瑟中林秋雲凝松桂冷山泉豈無適離人懷故境  
安得駕雲鴻高飛越南景

別湛甘泉

行子朝欲發驅車不得留逶迤不長坂顧見城東樓  
遠別情已慘況此艱難秋分手訣河梁涕下不可收  
車行望漸杳飛埃越層丘遲回岐路側孰知我心憂

四明觀白水

邑南富巖壑白水尤奇觀興來每思往十年就茲歡停  
騶指絕壁涉澗緣危蟠百源旱方歇雲際猶飛湍霏霏  
灑林薄漠漠凝風寒前聞若未愜仰視終莫攀石陰暑  
氣薄流觸澗回瀾茲遊詎盤樂養靜意所闕逝者諒如  
斯哀此歲月殘

書杖錫寺

杖錫青冥端澗壁環天險垂巖下陡壑涉水攀絕巘

深聽喧瀑路絕駭危棧捫蘿登峻極披翳見平行僧逋  
寄孤衲守廢遺荒殿傷茲窮僻墟曾未誅求免探幽冀  
累息憤時翻意慘拯援才已踈棲遲心益眷哀猿嘯春  
嶂懸燈宿西崦誅茅竟何時白雲愧舒卷

送蔡希巖

風雪蔽曠野百鳥凍不翻孤鴻亦何事噉噉遡寒雲豈  
伊稻梁計獨往求其羣之子眇萬鍾就我淦水濱野寺  
同遊請春山共攀援鳥鳴幽谷曙伐木西澗曛清夜湛

玄思晴窗玩奇文  
寂景賞新晤微言欣  
有聞寥寥絕代  
下此意冀可論

其二

羣鳥喧北林黃鵠獨南逝  
北林豈無枝羅弋苦難避之  
子丹霞姿辭我雲門去  
山空響流泉路僻迷深樹  
長谷何盤紆紫芝春可茹  
求志暫栖岩避喧寧遯世  
繫予辱風塵送子愧雲霧  
匡時已無術希聖徒有慕  
倘入陽明峰為尋舊栖處

鄭伯興謝病還鹿門雪夜過別賦贈

之子將去遠雪夜來相尋秉燭耿無寐憐此歲寒心歲  
寒豈徒爾何以贈遠行聖路塞已久千載無復尋豈無  
羣儒迹蹊逕榛茅深濬流須尋源積土成高岑攬衣望  
遠道請君從此征

遊牛首山

春尋指天闕烟霞眇何許雙峰久相違千嵒來舊主浮  
雲刺中天飛閣凌風雨探秀澗阿入蘿陰息筐筥滅迹

避塵纓清朝入深阻風磴仰捫歷淙壑屢窺俯梯雲躋  
石閣下榻得吾所釋子上方候鳴鐘出延佇頽景耀回  
盼層飈翼輕舉曖曖林芳暮泠泠石泉語清宵耿無寐  
峰月升烟宇會晤得良朋可以寄心腑

青原山次黃山谷韻

咨觀歷州郡驅馳倦風埃名山特乘暇林壑盤縈迴雲  
石緣欹徑夏木深層隈仰窮嵐霏際始覩臺殿開衣傳  
西竺舊構遺唐宋材風松溪溜急湍響空山哀妙香隱



玄洞僧屋懸穹崖攀依儼龍象陟降臨緯階飛泉瀉靈  
竇曲檻連雲櫺我來慨遺迹勝事多湮埋邈矣西方教  
流傳徧中垓如何皇極化反使吾人猜剝陽幸未絕生  
意存枯荻傷心眼底事莫負生前杯烟霞有本性山水  
乞歸骸崎嶇羊腸坂車輪幾傾摧蕭散麋鹿伴澗谷終  
追陪恬愉返真澹間寂辭喧阗至樂發天籟絲竹謝淫  
哇千古自同調豈必時代偕珍重二三子茲遊非偶來  
且從山叟宿勿受役夫催東峰上烟月夜景方徘徊

秋日飲月崑新構別王侍郎

湖山久繫念塊處限形迹遙望一水間十年靡由即軍  
旅起衰廢驅馳豈遑息前旌導回岡取捷上崎側新構  
鬱層椒石門轉深寂是時霜始降風淒羣卉圻壑靜響  
江聲窗虛涵海色夕陰下西岑涼月穿東壁觀風此餘  
情撫景見高臆匪從羣公餞何因得良覲南徼方如燬  
救焚敢辭亟來歸幸有期終遂幽尋僻

登小孤書壁

人言小孤殊阻絕從來可望不可攀上有巔厓勢欲隨  
下有劒石交巉頑峽風閃壁船難進洪濤舂撞蛟龍關  
帆檣摧縮不敢越往往退次依前山崖倚沙岼日東徙  
忽成巨浸通西灣帝心似憫舟楫苦神斧夜闢無痕斑  
風雷倏翕見萬怪人謀不得容其間我來銳意欲一往  
小舟微服沿回瀾側身脇息仰天竇懸空絕棧蛛絲慳  
風吹卯酒眼花落凍滑丹梯足力孱青鼉吹雨出仍沒  
白鳥避客來復還峰頭四顧盡落日宛然風景如瀛寰

烟霞未覺三山遠，塵土聊乘半日閒。  
奇觀江海詎為險，世情平地猶多艱。  
嗚呼世情平地猶多艱，回瞻北極雙  
淚潺。

廬山東林寺次韻

東林日暮更登山，峰頂高僧有蘭若。  
雲羅磴道石參差，水聲深澗樹高下。  
遠公學佛却援儒，淵明嗜酒不入社。  
我亦愛山仍戀官，同是乾坤避人者。  
我歌白雪聽何寡，山自點頭泉自瀉。  
月明壑底忽驚雷，夜半天風吹屋瓦。

又次二泉韻

昨遊開先殊草草今日東林遊始好手持蒼竹撥層雲  
直上青天招五老萬壑笙竽松籟哀千峰晻映芙蓉開  
坐俯西巖窺落日風吹孤月江東來莫向人間空白首  
富貴何如一杯酒種蓮栽菊兩荒涼惠遠陶潛骨何朽  
乘風我欲還金庭三洲弱水連沙汀他年海上望廬頂  
烟際浮萍一點青

江上望九華不見

五旬三過九華山一度陰寒一度雨比來天色稍晴明  
忽復昏霾起亭午平生山水最多緣獨此相逢容有數  
人言此山天所秘山下居人不常睹蓬萊涉海或可求  
瑤水崑崙俱舊遊洞庭何止吞八九五嶽曾向囊中收  
不信開雲掃六合手扶赤日照九州駕風騎氣覽八極  
視此瑣屑真浮漚

遊九華道中

微雨山路滑山行入輕舟桃花夾岼迷遠近迴巒疊嶂

盤深幽奇峰應接勞回首瞻之在前忽在後不道舟行  
轉屈曲但怪青山亦奔走薄午雨霽雲始開青鞋布襪  
無塵埃梅蹊柳徑度村落長松白石穿林隈始攀風磴  
出林杪更俯懸崖聽瀑雷亂山高頂藏平野茅屋高低  
自成社此中那得有人家恐是當年避秦者西巖日色  
漸欲下且向前林秣吾馬世途濁溢不可居吾將此地  
營蘭若

芙蓉閣

九華之山何崔嵬芙蓉直倚青天裁剛風倒海吹不動  
大雪裂地凍還開夜半峰頭挂明月宛如玉女臨粧臺  
我拂滄浪寫圖畫題詩還愧謫仙才

送邵文實方伯致仕

君不見櫛下雞引類呼羣啄且啼稻粱已足脂漸肥毛  
羽脫落充庖廚又不見籠中鶴歛翼垂頭困牢落籠開  
一旦入層雲萬里翱翔縱寥廓人生山水須認真胡為  
利祿纏其身高車駟馬盡桎梏雲臺靈閣俱埃塵鴟夷



抱恨浮江水何似乘舟逃海濱舜水龍山余舊宅讓公  
且作烟霞伯拂衣便擬逐公回為余先掃峰頭石

遊嶽麓書事

醴陵西來涉湘水信宿江城阻風雨不惟病齒畏風濕  
泥潦侵途絕行旅人言嶽麓最形勝隔水溟濛隱雲霧  
趙侯需晴邀我遊故人徐陳各傳語周生好事屢相期  
森森雨脚何由住曉來陰翳稍披拂便攜周生涉江去  
戒令休遣府中知徒爾勞人更妨務橘洲僧寺浮江流

鳴鐘出延立沙澣停橈一至答其情三洲連綿亦佳處  
行雲散漫浮日色是時峰巒益開吐亂流蕩槩濟倏忽  
繫楫江邊老檀樹岼行里許入麓口周生導余勤指顧  
柳蹊梅堤存彷彿道林林壑恒如故赤沙想像虛田中  
西嶼傾頽今冢墓道鄉荒址留突兀赫曦遠望石如鼓  
殿堂釋菜禮從宜下拜朱張息游所鑿石開山面勢改  
雙峰闢闕見江渚一時賓主云盡興樂闌觴周日將暮  
入舟暝色漸微茫却喜順流還易渡嚴城燈火人已稀

小巷曲折忘歸路仙宮酣倦成熟寐曉聞簷聲復如注  
昨遊偶遂寔天假信知行樂皆有數涉躡差償夙好心  
尚有名山敢多慕齒角虧盈分則然行李雖淹吾不惡

滁陽別諸友

滁之水入江流江潮日復來滁州相思若潮水來往何  
時休空相思亦何益欲慰相思情不如崇令德掘地見  
泉水隨處無弗得何必驅馳為千里遠相卽君不見堯  
羹與舜牆孔跖對面那相識逆旅主人多殷勤出門轉

盼成路人

夜宿無相寺

春宵卧無相月照五溪花  
掬水洗雙眼披雲看九華  
巖頭金佛國樹杪謫仙家  
彷彿聞笙鶴青天落絳霞

九華山李白祠

千古入豪去空山尚有祠  
竹深荒舊徑蘚合失殘碑  
雲雨羅文藻溪泉繫夢思  
老僧殊未解猶自索題詩

憶龍泉山

我愛龍泉寺寺僧頗踈野盡日坐井欄有時卧松下  
夕別山雲三年走車馬愧殺巖下泉朝夕自清瀉

憶諸弟

久別龍山雲時夢龍山雨覺來枕簟涼諸弟在何許終  
年走風塵何似山中住百歲如轉蓬拂衣從此去

送人東歸

五洩佳山水平生思一遊送子東歸省蓴鱸况復秋幽  
探思及壯世事苦悠悠來歲春風裏長安憶故丘

## 故山

鑑水終年碧雲山盡日間故山不可到幽夢每相關霧  
豹言長隱雲龍欲共攀緣知丹壑意未勝紫宸班

元明與予有衡嶽羅浮之期賦南遊申約也

南遊何迢迢蒼山亦南馳如何衡陽雁不見燕臺書莫  
歌澧浦曲未弔湘君祠蒼梧烟雨絕從誰問九疑

## 其二

洞庭何渺茫衡嶽何崔嵬風飄迴雁雪美人歸未歸我

有紫瑜珮留挂芙蓉臺下視蛟龍峽往往興雲雷

淑浦山夜泊

淑浦山邊泊雲間見驛樓灘聲迴遠樹崖影落中流柳  
放新年綠人歸隔歲舟客途時極目天北暮陰愁

古道

古道當長坂肩輿入暮天蒼茫聞驛鼓冷落見炊烟凍  
燭寒無焰泥爐濕未然正思江檻外閒却釣魚船

立春日道中短述

臘意中宵盡春容傷曉生野塘水轉綠江寺雪消晴農  
事沾泥犢羈懷聽谷鶯故山梅正發誰寄欲歸情

公館午飯偶書

行臺依獨寺僧屋自成隣殿古凝殘雪牆低入早春巷  
泥晴淖馬簷日暖堪人雲散前巖碧松梢挂月新

寄隱崑

每逢山水地便有卜居心終歲風塵裏何年滄海陰洞  
寒泉滴細花暝石房深青壁須留姓他時好共尋



香山次韻

尋山到山寺得意却忘山  
崑樹坐來靜壁蘿春自閒  
樓臺星斗上鐘磬翠微間  
頓息寰塵念清溪踏月還

還贛

積雨零都道山途喜乍晴  
溪流遲渡馬岡樹隱前旌  
野屋多移竈窮苗尚阻兵  
迎趨勤父老無補愧巡行

通天崑

青山隨地佳豈必故園好  
但得此身閒塵寰亦蓬島  
西

林日初暮明月來何早醉卧石牀涼洞雲秋未掃

圓明洞次謙之韻

羣山走波浪出沒龍蛇脊嵒棲寄盤渦沈淪遂成癖我  
來汲東溟爛煮南山石千年熟一炊欲餉嵒中客

將遊九華移舟宿寺山

逢山未愜意落日更移舫峽寺緣溪徑雲林帶石泉鐘  
聲先度嶺月色已浮川今夜嵒房宿寒燈不待懸

西安雨中諸生出候因寄德洪汝中并示書院

諸生

幾度西安道江聲暮雨時機心鷗鳥識踪跡水雲疑仗  
鉞非吾事傳經愧爾師天真泉石秀新有鹿門期

德洪汝中方卜書院盛稱天真之奇并寄及之  
不踏天真路依稀二十年石門深竹逕蒼峽瀉雲泉泮  
壁環胥海龜疇見宋田文明原有象卜築豈無緣

九華山下夜泊

維舟谷口傷烟霏共說前岡石徑微竹杖穿雲尋寺去

藤庄採藥帶花歸諸生晚佩照芳杜野老春霞綴衲衣  
風詠不須沂水上碧山明月更清輝

祈雨

見說虔南惟苦雨深山毒霧長陰陰我來偏遇一春旱  
誰解挽回三日霖寇盜郴陽方出掠干戈塞北還相尋  
憂民無計淚空墮謝病幾時歸海濤

借山亭

借山亭子近如何乘興時從夢裏過尚想清池環醉影

猶疑花徑駐鳴珂  
踈簾細雨燈前局  
碧樹涼風月下歌  
傳語諸公合頻賞  
休令歲月易蹉跎

次陳惟濬韻

環山落木正秋聲  
獨上高峰望眼明  
樹色遙連閩嶠碧  
江流不盡楚天青  
雲中想見雙龍轉  
風外時傳一笛橫  
莫遣新愁添白髮  
且呼明月醉沈醺

棲禪寺雨中與惟乾同登

絕頂深泥冒雨攀  
天于佳景亦多慳  
自憐久客頻移棹

頗羨高僧獨閉關  
江草遠連雲夢澤  
楚雲長斷九疑山  
年來出處渾無定  
慚愧沙鷗盡日閒

再至陽明別洞和邢太守韻

春山隨處款歸程  
古洞幽虛道意生  
澗壑風泉時遠近  
石門蘿月自分明  
林僧住久炊遺火  
野老忘機罷席爭  
習靜未緣成  
久坐却慚塵土逐虛名

書草萍驛

時九月  
獻俘

一戰功成未足奇  
親征消息尚堪危  
邊烽西北方傳警

民力東南已告疲萬里秋風嘶甲馬千山斜日度旌旗  
小臣何爾驅馳急欲請回鑾罷六師

西湖

靈鷲高林暑氣清竺天巖壁雨痕晴客來湖上逢雲起  
僧聚峰頭話月明世路久知難直道此身那得尚虛名  
移家早定孤山計種果支茅却易成

宿淨寺

老屋深松覆古藤羈棲猶記昔年曾棋聲竹裏消閒晝

藥裏窗前對病僧  
烟艇避人長曉出  
高峰遠望亦時登  
而今更是多牽繫  
欲似當時又不能

泊金山寺

但過金山便一登  
鳴鐘出迓每勞僧  
雲濤石壁深龍窟  
風雨樓臺迥佛燈  
難後詩懷全欲減  
酒邊孤興尚堪憑  
崑梯未用妨苔滑  
曾踏天峰雪棧冰

舟夜

隨處看山一葉舟  
夜深霜月亦兼愁  
翠華此際遊何地



畫角中宵起戍樓甲馬尚屯淮海北旌旗初散楚江頭  
洪濤滾滾乘風勢容易開帆不易收

阻風

冬江盡說風長北但我北來風便南未必天公真有意  
却逢人事偶相叅殘農得暖堪登穫破屋多寒且曝簷  
果使困窮能稍濟不妨經月阻江潭

望廬山

盡說廬山若箇奇當時圖畫亦堪疑九江風浪非前日

五老烟雲豈定期  
眼慣不妨層壁險  
足趼須著短筇隨  
香爐瀑布微如綫  
欲決天河瀉上池

次壁間杜牧韻

春山路僻問歸樵  
為指前峰石逕遙  
僧與白雲還瞑壑  
月隨滄海上寒潮  
世情老去渾無賴  
遊興年來獨未消  
回首孤帆又陳迹  
踈鐘隔渚夜迢迢

山僧

崑下蕭然老病僧  
曾求佛法禮南能  
論詩自許窺三昧

入聖無梯出小乘高閣松風飄夜磬石牀花雨落寒燈  
更深月出山窗曙漱齒焚香誦法楞

江邊阻風散步至靈山寺

歸船不遇打頭風行脚何緣到此中幽谷餘寒春雪在  
虛簷斜日暮江空林間古塔無僧住花外仙源有路通  
隨處看山隨處樂莫將踪跡嘆萍蓬

泊舟大同山溪間諸生聞之有挾冊來尋者

扁舟經月住林隈謝得黃鶯日日來兼有清泉堪洗耳

更多脩竹好銜杯諸生涉水携詩卷童子  
和雲掃石苔  
獨奈華峰隔烟霧時勞策杖上崔嵬

巖下桃花盛開携酒獨酌

小小山園幾樹桃安排春色候停橈開樽旋掃花陰雪  
展席平臨松頂濤地遠不須防俗駕溪晴還好著魚舠  
雲間石路稀人迹深處容無避世豪

重遊無相寺次舊韻

舊識仙源路未差來從谷口問桃花屢攀絕棧經殘雪

幾度清溪踏月華虎穴相連多異境鳥飛不到有僧家  
頻來休下仙翁榻只借峰頭一片霞

巖頭閒坐漫成

盡日巖頭坐落花不知何處是吾家靜聽谷鳥遷喬木  
閒看林蜂散午衙翠壁泉聲穿亂石碧潭雲影透晴沙  
癡兒公事真難了須信吾生自有涯

春日遊齊山

即看花發又花飛空向花前嘆式微自笑半生行脚過

何人未老乞身歸江頭鼓角翻春浪雲外旌旗閃落暉  
羨殺山中麋鹿伴千金難買芰荷衣

又

倦鳥投枝已亂飛林間暝色漸霏微春山日暮成孤坐  
遊子天涯正憶歸古洞濕雲含宿雨碧溪明月弄清輝  
桃花不管人間事只笑山人未拂衣

月下吟

露冷天清月更輝可堪遊子倍沾衣催人歲月心空在

滿眼兵戈事漸非方朔本無金馬意班超惟願玉門歸  
白頭應倚庭前樹怪我還期秋已遠

火秀宮次一峰韻

清溪曲曲轉層林始信桃源路未深晚樹烟霏山閣靜  
古松雷雨石壇陰丹爐遺火飛殘藥仙樂浮空寄絕音  
莫道山人才一到千年陳迹此重尋

夜宿浮峰次謙之韻

日日春山不厭尋野情原自懶朝簪幾家茅屋山村靜

夾岼桃花溪水深石路草香隨鹿去洞門蘿月聽猿吟  
禪堂坐久發清磬却笑山僧亦有心

再遊延壽寺次舊韻

歷歷溪山記舊踪寺僧遙住翠微重扁舟曾泛桃花入  
岐路新多草樹封谷口鳥聲兼伐木石門烟火出深松  
年來百好俱衰薄獨有幽探興尚濃

秋夜

春園花木始菲菲又是高秋落葉稀天迥樓臺含氣象



月明星斗避光輝閒來心地如空水靜後天機見隱微  
深院寂寥羣動息獨憐烏鵲繞枝飛

觀從吾登爐峰絕頂戲贈

道人不奈登山癖日暮猶思絕棧源嵒底獨行穿虎穴  
峰頭清嘯亂猿羣清溪月出時尋寺歸棹城隅夜款門  
可笑中郎無好興獨留松院坐黃昏

山中漫興

清晨急雨度林扉餘滴烟稍尚濕衣雨水霞明桃亂吐

沿溪風暖藥初肥物情到底能容懶  
世事從前頓覺非  
自擬春光還自領好誰歌詠月中歸

謁伏波廟

樓船金鼓宿烏蠻魚麗羣舟夜上灘  
月繞旌旗千嶂靜  
風傳鈴柝九溪寒  
荒夷未必先聲服  
神武由來不殺難  
想見虞廷新氣象兩階干羽五雲端

南寧

一駐南寧五月餘  
纔因送遠過僧廬  
浮屠絕壁經殘燹

井竈沿村見廢墟撫恤尚慚凋敝後遊觀正及省耕初  
近聞極負歸徭徃莫陋夷方不可居

遊牛峰寺

縈紆鳥道入雲松下數湖南百二峰巖犬吠時人出樹  
山僧迎客自鳴鐘凌飈陟險真扶病異日探奇是舊踪  
欲扣靈闕問真訣春風蘿薜覆重重

姑蘇吳氏海天樓次鄭尹韻

晴雪吹寒春事濃江樓三月尚殘冬青山暗逐回廊轉

碧海真成捷徑通風暖簷牙雙燕劇雲深簾幕萬花重  
倚欄天北疑回首想像丹梯下六龍

尋春

十里湖光放小舟謾尋春事及西疇江鷗意到忽飛去  
野老情深只自留日暮草香含雨氣九峰晴色散溪流  
吾儕是處皆行樂何必蘭亭說舊遊

西湖醉中漫書

十年塵海勞魂夢此日重來眼倍清好景恨無蘇老筆

乞歸徒有賀公情  
白鳥飛處青林晚  
翠壁明邊返照清  
爛醉湖雲宿湖寺  
不知山月墮江城

化城寺

化城高住萬山深  
樓閣憑空上界侵  
天外清秋度明月  
人間微雨結輕陰  
鉢龍浮處雲生座  
巖虎歸時風滿林  
最愛山僧能好事  
夜堂燈火伴孤吟

其二

雲裏軒窗半上鉤  
望中千里見江流  
高林日出三更曉

幽谷風多六月秋  
仙骨自憐何日化  
塵緣翻覺此生浮  
夜深忽起蓬萊興  
飛上青天十二樓

其三

雲端鼓角落星斗  
松頂袈裟散雨花  
一百六峰開碧漢  
八十四梯踏紫霞  
山空仙骨葬金櫛  
春暖石芝抽玉芽  
獨揮談麈拂烟霧  
一笑天地真無涯

歲暮

兀坐經旬成木石  
忽驚歲暮還思鄉  
高簷白日不到地

深夜點鼠時登牀峰頭霽雪開草閣瀑下古松閑石房  
溪鶴洞猿爾無恙春江歸棹吾相將

天涯

天涯歲暮水霜結永巷人稀罔象遊長夜星辰瞻閣道  
曉天鐘鼓隔雲樓思家有淚仍多病報主無能合遠投  
留得昇平雙眼在且應簑笠卧滄洲

因雨和杜韻

晚堂疎雨暗柴門忽入殘荷瀉石盆萬里滄江生白髮

幾人燈火坐黃昏客途最覺秋先到荒徑誰憐菊尚存  
却憶故園耕釣處短簑長笛下江村

赴謫次北新關喜見諸弟

扁舟風雨泊江關兄弟相看夢寐間已分天涯成死別  
寧知意外得生還投荒自識君恩遠多病心便吏事閒  
携汝耕樵應有日好移茅屋倚雲山

南屏

溪風漠漠南屏路春服初成病眼開花竹日新僧已老



湖山如舊我重來層樓雨急青林迥古殿雲晴碧嶂迴  
獨有幽禽解相信雙飛時下讀書臺

卧病靜慈寫懷

卧病空山春復夏山中幽事最能知雨晴階下泉聲急  
夜靜松間月色遲把卷有時眠白石解纓隨意濯清漪  
吳山越嶠俱堪老正奈燕雲繫遠思

移居勝果寺

江上但知山色好峰迴始見寺門開半空虛閣有雲住

六月深松無暑來病肺正思移枕簟洗心兼得遠塵埃  
富春只尺烟濤外時倚層霞望釣臺

武夷次壁間韻

肩輿飛度萬峰雲回首滄波月下聞海工真為滄水使  
山中行遇武夷君溪流九曲初諳路精舍千年不染氛  
歸去高堂慰垂白細探仍擬在春分

玉山東嶽廟遇舊識嚴星士

憶昨東歸亭下路數峰簫管隔秋雲肩輿欲到妨多事

鼓枻重來會有云春夜絕憐燈節近溪聲最好月中聞  
行藏無用君平卜請看沙邊鷗鷺羣

廣信元夕蔣太守舟中夜話

樓臺燈火水西東簫鼓星橋度碧空何處忽談塵世外  
百年惟此月明中客途孤寂渾常事遠地相求見古風  
別後新詩如不惜衡南今亦有飛鴻

夜泊石亭寺用韻呈陳婁諸公因寄儲柴墟都  
憲及喬白巖太常諸友

廿年不到石亭寺惟有西山只舊青  
白拂挂牆僧已去  
紅闌照水客重經沙村遠樹凝春望  
江雨孤蓬入夜聽  
何處故人還笑語東風啼鳥夢初醒

夜宿宣風館

山石崎嶇古轍痕沙溪馬渡水猶渾  
夕陽歸鳥深投麓  
烟火行人望遠村天際浮雲生白髮  
林間孤月坐黃昏  
越南冀北俱千里正恐春愁入夜魂

萍鄉道中謁濂溪祠

木偶相沿恐未真清輝亦復凜衣巾簿書曾屑乘田吏  
俎豆猶存畏壘民碧水蒼山俱過化光風霽月自傳神  
千年私淑心雖後下拜春祠薦渚蘋

宿萍鄉武雲觀

曉行山徑樹高低雨後春泥沒馬蹄翠色拖雲開疊嶂  
寒聲隔竹隱晴溪已聞南去艱舟楫漫憶東歸阻杖藜  
夜宿仙家見明月清光還似鑑湖西

羅舊驛

客行日日萬峰頭山水南來亦勝遊  
布穀鳥啼村雨暗刺桐花暝石溪幽  
蠻烟喜過青楊瘴鄉思愁經芳杜洲  
身在夜郎家萬里五雲天北是神州

沅水驛

辰陽南望接沅州碧樹林中古驛樓  
遠客日憐風土異空山惟見瘴雲浮  
耶溪有信從誰問楚水無情只自流  
却幸此身如野鶴人間隨地可淹留

鐘鼓洞

見說水南多異迹巖頭時有鼓鐘聲  
空遺石壁千年在  
未信金沙九轉成  
遠地星辰瞻北極  
春山明月坐更深  
年來夷險還忘却  
始信羊腸路亦平

清平衛即事

積雨山途喜乍晴  
暖雲浮動水花明  
故園日與青春遠  
敝緼涼思白苧輕  
烟際草衣窺絕棧  
峰頭戍角隱孤城  
華夷節制嚴冠履  
漫說殊方列省卿

興隆衛書壁

山城高下見樓臺  
野戍參差暮角催  
貴竹路從峰頂入  
夜郎人自日邊來  
鶯花夾道驚春老  
雉堞連雲向曉開  
尺素屢題還擲却  
衡陽那有雁飛回

七盤

鳥道縈紆下七盤  
古藤蒼木峽聲寒  
境多奇絕非吾土  
時可淹留是謫官  
猶記邊烽傳羽檄  
近聞苗俗化衣冠  
投簪實有居夷志  
垂白難承菽水歡

龍岡漫興



投荒萬里入炎州却喜官卑得自由心慚夷居何有陋  
身符吏隱未忘憂春山卉服時相問雪寨籃輿每獨遊  
擬把犂鋤從許子謾將絃誦止言遊

卧龍一去忘消息千古龍岡漫有名草屋何人方管樂  
桑間無耳聽咸英江沙漠漠遺雲鳥草木蕭蕭動甲兵  
好共鹿門龐處士相期采藥入青冥

過天生橋

水光如練落長松雲際天橋隱白虹遼鶴不來華表爛

仙人一去石橋空徒聞鵲架橫秋夕謾說秦鞭到海東  
移放長江還濟險可憐虛却萬山中

春晴

林下春晴風漸和高巖殘雪已無多遊絲冉冉花枝靜  
青壁迢迢白鳥過忽向山中懷伴侶還從洞口夢烟蘿  
客衣塵土終須換好與湖邊長芰荷

陸廣曉發

初日瞳瞳似曉霞雨痕新霽渡頭沙溪深幾曲雲藏峽

樹老千年雪作花  
白鳥去邊迴驛路  
青崖缺處見人家  
徧行奇勝才經此  
江上無勞羨九華

雪夜

天涯久客歲侵尋  
茅屋新開楓樹林  
漸慣省言因病齒  
屢經多難解安心  
猶憐未繫蒼生望  
且得閒為白石吟  
乘興最堪風雪夜  
小舟何日返山陰

元夕

故園今夕是元宵  
獨向蠻村坐寂寥  
賴有遺經堪作伴

喜無車馬過相邀  
春還草閣梅先動  
月滿虛亭雪未消  
堂上花燈諸第集  
重闌應念一身遙

家僮作紙燈

寥落荒村燈事賒  
蠻奴試巧剪春紗  
花枝綽約含輕霧  
月色玲瓏膜綺霞  
取辦不徒酬令節  
賞心兼是惜年華  
何如京國王侯第  
一盞中人產十家

白雲堂

白雲僧舍市橋東  
別院迴廊小徑通  
歲古簷松存獨榦

春還庭竹發新叢  
晴窗暗映羣峰雪  
清梵長飄高閣風  
遷客從來甘寂寞  
青鞵時過月明中

來僊祠

古洞春寒客到稀  
綠苔荒迳草霏霏  
書懸絕壁留仙偈  
花發層蘿繡佛衣  
壺榼還從童冠集  
杖藜隨處世情微  
石門遙鎖陽明鶴  
應笑山人久不歸

木閣道中雪

瘦馬支離緣絕壁  
連峰窅窕入層雲  
山村樹暝驚鴉陣

澗道雪深逢鹿羣，凍合衡茅炊火斷。  
望迷孤戍暮笳聞，正思講席諸賢在絳蠟。  
清醅坐夜分。

元夕雪用蘇韻

林間暮靄定歸鴉，山外鈴聲報使車。  
玉盞春光傳柏葉，夜堂銀燭亂簷花。  
蕭條音信愁邊雁，迢遞關河夢裏家。  
何日扁舟還舊隱，一蓑江上把魚叉。

寒威入夜益廉纖，酒甕爐床亦戒嚴。  
久客漸憐衣有結，蠻居長嘆食無鹽。  
飢豺正爾羣當路，凍雀從渠自宿簷。

陰極陽回知不遠蘭芽行見發春尖

曉霽用前韻書懷

雙闕鐘聲起萬鴉禁城月色滿朝車竟誰詩詠東曹檜  
正憶梅開西寺花此日天涯傷逐客何年江上却還家  
曾無一字堪驅使漫有虛名擬八義

澗草巖花欲闕纖溪風林雪故爭嚴連岐盡說還宜麥  
煮海何曾見作鹽路斷慙憐無過客病餘兼喜曝晴簷  
謫居亦自多清絕門外羣峰玉笋尖

夜宿汪氏園

小閣藏身一斗方，夜深虛白自生光。  
梁間來下徐生榻，座上慚無荀令香。  
驛樹雨聲翻屋瓦，龍池月色浸書床。  
他年貴竹傳遺事，應說陽明舊草堂。

春行

冬盡西歸滿山雪，初春復來花滿山。  
野鷗亂浴清溪上，黃鳥雙飛綠樹間。  
物色變遷隨白眼，人生豈得長朱顏。  
好將吾道從吾黨，歸把漁竿東海灣。



村南

花事紛紛春欲酣  
杖藜隨步過村南  
田翁開野教新犢  
溪女分流浴種蠶  
穉犬吠人依密槿  
閒鳬照影立晴潭  
偶逢江客傳鄉信  
歸卧楓堂夢石龕

山途

上山見日下山陰  
陰欲開時日欲沈  
晚景無多傷遠道  
朝陽莫更阻雲岑  
人歸暝市分漁火  
客舍空林依暮禽  
世事驗來還自頷  
古人先已得吾心

又

南北驅馳任板輿  
謫鄉何地是安居  
家家細雨殘燈後  
處處荒原野燒餘  
江樹欲迷遊子望  
朔雲長斷故人書  
茂陵多病終蕭散  
何事相如賦子虛

答劉美之見寄次韻

休疑遷客迹全貧  
猶有沙鷗日見親  
勲業久辭滄海夢  
烟花多負故園春  
百年長恐終無補  
萬里寧期尚得身  
念我不勞傷鬢雪  
知君久已拂衣塵

書庭蕉

簷前蕉葉綠成林  
長夏全無暑氣侵  
但得雨聲連夜靜  
何妨月色半牀陰  
新詩舊葉題將滿  
老菱疎桐恨共深  
莫笑鄭人談訟鹿  
至今醒夢兩難尋

送張憲長左遷滇南大叅次韻

世味知君最飽諳  
百年清德亦何慚  
柏臺藩省官非早  
江漢滇池道益南  
絕域烟花憐我遠  
今宵風月好誰談  
交遊若問居夷事  
為說山泉頗自堪

南菴次韻

隔水樵漁亦幾家  
緣岡石路入溪斜  
松林晚映千峰雨  
楓葉秋連萬樹霞  
漸覺形骸逃物外  
未妨遊樂在天涯  
頻來不用勞僧榻  
已僭沙鷗一席沙

其二

斜日江波動客衣  
水南深竹見巖扉  
漁人罷網舟初集  
野老忘機坐未歸  
漸覺雲間棲翼亂  
愁看天北暮雲飛  
年年歲晚長為客  
閒殺西湖舊釣磯

觀傀儡次韻

處處相逢是戲場何須傀儡夜登堂  
繁華過眼三更促名利牽人一線長  
穉子故應爭詫說矮人空復自悲傷  
本來面目還誰識且向樽前學楚狂

徐都憲同遊南菴次韻

巖寺藏春長不夏江花映日艷于桃  
山陰入戶川光暮林影浮空暑氣高  
樹老豈能知歲月溪清真可鑑秋毫  
但逢佳景須行樂莫遣風霜著鬢毛

即席次王文濟少叅韻

此身未擬泣窮途  
隨處翻飛野鶴孤  
霜冷幾枝存晚菊  
溪春兩度見新蒲  
荆西寇盜紆籌策  
湘北流移入畫圖  
莫怪當筵倍淒切  
誅求滿地促官逋

夜寒

簷際重陰覆夜寒  
石爐松火坐更殘  
窮荒正訝鄉書絕  
險路仍愁歸夢難  
仙侶春風懷越嶠  
釣船明月負嚴灘  
未因謫宦傷憔悴  
客鬢還羞鏡裏看

次韻送陸文順僉憲

貴陽東望楚山平，無奈天涯又送行。  
杯酒豫期傾蓋日，封書煩慰倚門情。  
心馳魏闕星辰迥，路遶鄉山草木榮。  
京國交遊零落盡，空將秋月寄猿聲。

次韻胡少叅見過

旋營小酌典春裘，佳客真慚竟日留。  
長怪嶺雲迷楚望，忽聞吳語破鄉愁。  
鏡湖自昔堪歸老，杞國何人獨抱憂。  
莫問臨花倍惆悵，賞心原不在枝頭。

過江門崖

三年謫宦沮蠻氛天放扁舟下楚雲  
歸信應先春雁到閒心期與白鷗  
羣晴溪欲轉新年色蒼壁多遺古篆文  
此地從來山水勝它時回首憶江濱

武陵潮音閣懷孔明

高閣憑虛臺十尋捲簾踈雨動微吟  
江天雲鳥自來去楚澤風烟無古今  
山色漸疑衡嶽近花源欲問武陵深  
新春尚阻東歸楫落日誰堪話此心



夜宿香山林宗師房次韻

幽壑來尋物外情，石門遙指白雲生。  
林間伐木時聞響，谷口逢僧不記名。  
天壁倒涵湖月曉，烟梯高接緯階平。  
松堂靜夜渾無寐，到枕風泉處處聲。

杖錫道中用張憲使韻

山鳥歡呼欲問名，山花含笑似相迎。  
風迴碧樹秋聲早，雨過丹崖夕照明。  
雪嶺挿天開玉帳，雲溪環碧抱金城。  
懸燈夜宿茅堂靜，洞鶴林僧相對清。

又用曰仁韻

每逢佳處問名山風景依稀過眼生  
歸霧忽連千嶂暝  
夕陽偏放一溪晴晚投岩寺依雲宿  
靜愛楓林送雨聲  
夜久披衣還起坐不禁風月照人清

贈熊彰歸

門逕荒涼蔓草生相求深愧遠來情  
千年絕學蒙塵土  
何處澄江無月明坐看遠山凝暮色  
忽驚塵葉起秋聲  
歸途望嶽多幽興為問山田待耦耕

送守中至龍盤山中

未盡師生六日情  
天教風雪阻西行  
茅堂豈有春風坐  
江郭虛留一月程  
客邸琴書燈火靜  
故園風竹夢魂清  
何年穩閉陽明洞  
楫拙山爐煮石羹

龍盤山中用韻

無奈青山處處情  
村沽日日辦山行  
真慚廩食虛官守  
只把山遊作課程  
谷口亂雲隨騎遠  
林間飛雪點衣輕  
長思澹泊還真性  
世味年來久絮羹

別希顏

後會難期別未輕  
莫辭行李滯江城  
且留南國春山興  
共聽西堂夜雨聲  
歸路終知雲外去  
晴湖想見鏡中行  
為尋洞裏幽栖處  
還有峰頭雙鶴鳴

龍潭夜坐

何處花香入夜清  
石林茅屋隔溪聲  
幽人月出每孤往  
棲鳥山空時一鳴  
草露不辭芒屨濕  
松風偏與葛衣輕  
臨流欲寫猗蘭意  
江北江南無限情

送德觀歸省

雪裏閉門十日坐開門一笑忽青天茅簷正好負暄日  
客子胡為思故園椿樹慣經霜雪老梅花偏向歲寒妍  
瑯琊春色如相憶好放山陰月下船

寄浮峰詩社

晚涼庭院生新秋微月初生亦滿樓千里故人誰命駕  
百年多病有孤舟風霜草木驚時態砧杵關河動遠愁  
飲水曲肱吾自樂茅堂今在越溪頭

題王實夫畫

隨處山泉著草衣底須松竹掩柴扉  
天涯遊子何曾出畫裏孤帆未是歸  
小酉諸峰開夕照虎溪春寺入烟霏  
他年還向辰陽望却憶題詩在翠微

寄馮雪湖

竹竿誰隱扶桑東白耆之叟今龐公  
隔湖聞雞謝墅接渡海有鶴蓬山通  
鹵田經歲苦秋雨浪痕半壁驚湖風  
歌聲屋底似金石點也此意當能同

贈潘給事

五月滄浪濯足歸正堪荷葉製初衣甲非乙是君休問  
酉水辰山志未違沙鳥不須疑雀舫江雲先為掃漁磯  
武陵溪壑猶深僻莫更移家入翠微

登憑虛閣和石少宰韻

山閣新春負一登酒邊孤興晚堪乘松間鳴瑟驚棲鶴  
竹裏茶烟起定僧望遠每來成久坐傷時有涕恨無能  
峰頭見說連閭闔幾欲排雲尚未曾

遊清涼寺

春尋載酒本無期，乘興還嫌馬足遲。  
古寺共憐春草沒，遠山偏與夕陽宜。  
雨晴澗竹消蒼粉，風暖巖花落紫蕤。  
昏黑更須凌絕頂，高懷想見少陵詩。

又

積雨山行已後期，更堪多病益遲遲。  
風塵漸覺初心負，丘壑真于野性宜。  
綠樹陰層新作蓋，紫蘭香細尚餘蕤。  
輞川圖畫能如許，絕是無聲亦有詩。



寄張東所次前韻

遠趨君命忽中違此意年來識者稀  
黃綺曾為炎祚出子陵終向富春歸  
江船一話千年濶塵夢今驚四十非  
何日孤帆過天目海門春浪掃漁磯

別余縉子紳

寧須買棹往來頻我亦携家向海濱  
但得青山隨鹿豕未論黃閣畫麒麟  
喪心疾已千年痼起死方存六籍真  
歸向蘭溪溪上問桃花春水正迷津

回軍上杭

山城經月駐旌戈亦復幽尋到薜蘿南國已歡回甲馬  
東田初喜出農簑溪雲曉度千峰雨江漲新闕岼波  
暮倚七星瞻北極絕憐蒼翠晚來多

聞曰仁買田雲上携同志待予歸二首

見說相携雲上耕連簑應已出烏程荒畬初墾功須倍  
秋熟雖微稅亦輕雨後湖舠兼學釣餉餘堤樹合閒行  
山人久有歸農興猶向千峰夜度兵

月色高林坐夜沈此時何限故園心  
山中古洞陰蘿合江上孤舟春水深  
百戰自知非舊學三驅猶愧失前禽  
歸期久負雲門伴獨向幽溪雪後尋

蓮花峰

夜靜涼飈發輕雲散碧空  
玉鉤挂新月露出青芙蓉

九華山下柯秀才家

蒼峰抱層嶂翠瀑繞雙溪  
下有幽人宅蘿深客到迷

無相寺三首

老僧巖下屋繞屋皆松竹朝聞春鳥啼夜伴岩虎宿  
坐望九華碧浮雲生曉寒山靈應秘惜不許俗人看  
靜夜聞林雨山靈似欲留只愁梯石滑不得到峰頭

宿天池月下聞雷次早知山下大雨

昨夜月明峰頂宿隱隱雷聲在山麓曉來却問山下人  
風雨三更捲茅屋

文殊臺夜觀佛燈

老夫高卧文殊臺拄杖夜撞青天開散落星辰滿平野

山僧盡道佛燈來

書扇贈從吾

君家只在海西隈  
日日寒潮去復迴  
莫遣扁舟成久別  
爐峰秋月望君來

題四老圍棋圖

世外烟霞亦許時  
至今風致後人思  
却懷劉項當年事  
不及山中一著棋

泛海

險夷原不滯胸中何異浮雲過太空  
夜靜海濤三萬里月明飛錫下天風

袁州府宜春臺

臺名何事只宜春山色無時不可人  
不用烟花費粧點儘教刊落自嶙峋

古廟香燈幾許年增脩還費大官錢  
至今楚地多風雨猶道山神駕鐵船

夜宿功德寺次宗賢韻

山行初試夾衣輕脚軟黃塵石路生一夜洞雲眠未足  
湖風吹月渡溪清

又

水邊楊柳覆茅楹飲馬春流上一亭坐久遂忘歸路夕  
溪雲正瀉暮山青

別方叔賢

西樵山色遠依依東指江門石路微料得楚雲臺上客  
久懸秋月待君歸

題歲寒亭贈汪尚和

一覺紅塵夢欲殘  
江城六月滯風湍  
人同炎暑無逃遁  
歸向山中卧歲寒

山中懶睡


掃石焚香任意眠  
醒來時有客談玄  
松風不用蒲葵扇  
坐對青崖百丈泉

用實夫韻

詩從雪後吟偏好  
酒向山中味轉佳  
岩瀑隨風雜鐘磬



水花如雨落袈裟



石倉歷代詩選卷四百五十五